

東
華
續
錄

東華續錄

同治十八

臣王先謙敬編

臣張式恭恭校

同治二年癸亥春正月戊申朔元旦節免朝賀○實授張之葛河

南巡撫○以劉郁膏爲江蘇按察使

由候補知府遷

萬啓琛爲安徽按察

使

由記名道遷

○已酉諭議政王軍機大臣等崇厚奏南宮緊急調兵

扼堵並文煜奏擊賊於胡賈村目寨各摺片據奏崇厚於十二月

二十九日馳抵南宮縣催調後起春霖所帶馬步兵並咨令文

煜飛撥馬隊兜剿擬暫紮南宮縣城居中策應請飭文煜所督兵

勇前截後追等語合之文煜所報賊於二十四五等日由成安竄

至邯鄲闌入縣城復卽奔竄二十六日姜國仲余承恩等帶領兵

勇迎至永年縣北胡賈地方擊之獲勝並於是夜賊屯目寨乘勢

掩擊賊由東北奔竄雞澤一帶等情形是賊又由雞澤一帶東北竄至南宮縣境崇厚自應飛催後路春霖所帶之兵迎頭截擊並卽檄催姜國仲余承恩等兵勇上緊跟追薩薩布帶領馬隊京兵於二十六七日已行抵順德文煜今由任城馳赴鉅鹿與姜國仲等南北兩路夾攻於地勢軍情是否悉協成保此時應亦趕到卽著崇厚與之商同調度四面兜圍無難乘我兵新銳一鼓殲除惟直東邊界伏莽甚多崇厚所奏南宮之賊是否卽係文煜所奏竄至雞澤一股抑係另股著崇厚確切探明具奏如股數不少卽須分兵剿辦應如何分布堵擊之處卽與成保妥籌辦理崇厚務當懷遵前奉諭旨實力圖功毋蹈瞻徇欺飾種種惡習嗣後軍前事宜並著與成保聯銜具奏文煜摺片均著發交崇厚閱看將此由六百里諭令知之○調單懋謙爲吏部左侍郎以曹毓瑛爲工部

左侍郎

由大理寺卿遷

○庚戌諭議政王軍機大臣等崇厚奏賊撲南宮

旋即竄逸譚廷襄奏擬飭宋憬詩赴淄川剿賊並催德楞額等專
勦南捻各摺片直隸匪徒糾眾攻撲南宮縣城見雖竄逸究未大
受懲創薩薩布已抵南宮興福等所帶馬步先後可到成保所統
馬隊亦抵甯晉諒卽日可以到齊但兵分力薄此股匪徒飄忽靡
定著崇厚晤商成保統籌全局分途兜剿趁此該署督初到之後
申明賞罰一鼓作氣以期剋日殲除不得徒託空言仍蹈文煜等
覆轍宋憬詩所部如無不法情事准其調赴淄川助剿以贖前愆
該撫務飭在事員弁嚴爲防範如再有反側惟譚廷襄是問黃國
瑞圍攻長城兵力已敷布置德楞額富和自應恪遵前旨追剿李
成股匪何以譚廷襄節次飛催尙無跟蹤覆信是德楞額等有意
遷延不遵調度挾從前被參之嫌以縱賊爲報復如此居心看來

不能受朝廷保全之恩著譚廷襄傳旨嚴行申飭如再不實力追剿卽著據實奏聞候旨懲創以肅軍律其長城匪眾並著嚴飭黃國瑞迅卽殲除張錫珠股匪據譚廷襄奏稱尙在館陶其南宮等處匪徒是否卽係該匪黨與張玉懷究在何處並著崇厚確切查明具奏再本日據孟傳金奏冀州牧丁學易性耽安逸以致民團破敗各等語並著崇厚查明奏聞其餘該御史所陳剿賊各情雖文理未能通暢議論亦未見切實惟崇厚初次權篆封疆遇事尤應格外畱心原摺著鈔給閱看如有可採擇之處亦不當以人廢言也將此由六百里各諭令知之○諭唐訓方奏偵探巢縣賊情及派兵剿撫捻圩各等語運漕鎮踞匪經肅慶衍督軍會同水師攻克向銅城牐遁去而巢縣逆黨踞守如故將來水陸官軍會攻巢縣該逆勢必窮蹙思竄唐訓方白應督飭張得勝扼住梁園嚴

防竄越定遠縣西鄉土匪雖經攻毀四圩招撫餘匪仍應防其反側著唐訓方飭令唐啟虞會同該縣知縣李益林嚴密稽查如稍有蠢動卽趕緊撲滅毋令勾結爲患王才秀等進軍蒙城誘殺捻首進官標等先後收撫賊圩二十一處官軍聲勢甚壯著卽激勵將士迅將西洋高鑪一帶捻圩攻拔以期節節掃蕩會合僧格林沁所部直擣捻巢廓清皖境唐訓方另片奏三河尖釐局向係接濟臨撫兩營軍餉嗣勝保帶兵援潁在三河尖北岸立卡抽釐李續宜遂於南岸設局見在勝保被逮北岸釐局應歸皖營接辦請飭河南撫臣毋庸派員設局等語三河尖本係皖省地面該鎮既有兩局自未便再行添設重累商民所有張之萬前請於三河尖設立釐局之處著卽停止將此由五百里各諭令知之○辛亥李鴻章奏據報署浙江總兵勒伯勒東由上虞分道進攻紹興府城

帶隊直薄城下槍礮互轟斃賊不少詎該總兵親放大礮藥多礮炸致傷頭頂登時殞命並傷外國兵頭范夫哈格齡二員洋兵密楷爾密蓋爾二名查勒伯勒東本係法國兵官自權授中國總兵感沐 聖恩益加奮勉茲以急取紹城親然巨礮臨陣傷亡實屬效忠盡命應請飭部從優議卹其兵頭范夫哈格齡等請一併議卹以慰忠魂 上諭內閣總兵勒伯勒東進攻紹興親放大礮藥多礮炸致傷頭頂登時殞命雖非陷陣捐軀實係歿於行間與陣亡無異著交部從優議卹仍著李鴻章飭屬妥爲營葬以慰忠魂其同時陣亡之范夫哈格齡等著一併交部議卹○河南巡撫張之萬奏查汝南自陳大澹倡亂以來偏脅各寨幾於四面皆賊官軍旣克陳寨乘勝進討軍威所懾民圩以次反正刻下汝南西北已無匪蹤南則明港陡溝各寨疊經李續燾等剿撫兼施見已畏

罪乞降無庸重煩兵力惟東路項城新息之交小股伏莽尙多疊經帶兵將領及各該地方官盡力勦捕擒斬甚多寨首有乞降者岳城一帶向爲匪徒出沒之所臣復調參將尹嘉賓所部與陳祿興併力扼守兼彈壓就撫各寨其西南則邢集踞匪負隅未下經李續燾進兵擊敗復調全隊晝夜合圍以期滅此朝食該匪勢孤援絕見亦畏勦思降惟陳大濤回竄桐境游駛於縣東之固鎮吳城一帶與林振山勾結之眾尙有三千人張曜率馬隊追之至平昌關距固鎮六十里臣已飛檄該鎮調集步隊節節探蹤而前並令南陽鎮暨該府縣率領兵團會合夾擊李續燾一軍如邢集業已得手即可分兵西進爲張曜後路策應務將陳逆殲擒勿令免脫臣見親抵汝南自當乘諸軍會集之時督率將士殄滅兇渠不令稍畱根株致貽後患汝南各軍統計萬數千人已不爲少而

散紮明港陡溝等處分布轉覺其單且克一寨卽分一軍兵力必有所不給臣愚以爲郡城宜有重兵方足以資鎮壓且毫捻被剿刻刻爲避兵出竄之計歸陳一帶門戶洞開不可不先期布置臣此番抵汝僅有小隊數百人緩急難恃已將袁甲三舊部九百人檄調來汝爲臣親軍並飭總兵余際昌率所部馳回汝郡候臣調遣如此運掉較靈各路均可兼顧 上諭議政王軍機大臣等陳大澐被剿回竄桐境游弋於固鎮吳城一帶與林振山匪徒勾結見在張曜督率馬隊追至平昌關著張之萬會同毛昶熙嚴飭該總兵調集步隊探蹤前進會合各路兵團四面兜圍毋令再行竄逸邢集踞匪負隅未下屢經李續燾進兵擊敗並著飭令該總兵趕緊合圍盡殲醜類如邢集業已得手卽飛調李續燾一軍分兵西進爲張曜後路策應其汝東一帶伏莽尙多仍著飭令陳祿興

等扼守岳城一帶鎮壓就撫各寨以防反側張之萬見調袁甲三舊部來汝並調余際昌全隊馳回汝郡該撫等務當酌度緩急相機策應肅清南圉以副委任將此由五百里各諭令知之○都興阿奏撤水師舊船及布置江防各事宜○廣江西廣豐縣學額二名○壬子諭議政王軍機大臣等崇厚奏賊竄冀州境內請增兵籌餉迅速剿辦一摺見在各起馬步兵勇陸續到齊著崇厚飭令星夜馳赴冀州以北繞出賊前會合堵剿成保所帶京營馬隊四百名已至南宮著卽會商該副都統妥籌調度於要隘地方設伏邀擊毋任再行竄越其調赴山西之後起馬隊官兵二百五十名著准其暫畱直隸軍營歸成保薩薩布統帶以厚兵力俟直境匪勢稍鬆仍飭赴山西防所天津所練京綠各營洋槍隊原較各營兵勇更爲得力至原教之外國兵弁在海口百姓習見不驚今令

隨同前赴軍營恐畿南各處人情疑懼該署督務當嚴爲約束俾兵民得以相安如大股迅就撲滅卽將洋槍隊仍調回天津練習不得久畱以節經費所籌寬備糧餉各情均著照所議辦理將此由五百里諭令知之○曾國藩奏恭奉諭旨以金陵逆賊有投誠之信飭令酌辦一節查金陵一城袤延百里之遙我軍分屯雨花臺僅扼城南其東西北三面並未合圍詎能制賊死命目下僞忠王雖潛回蘇州而金陵城外各賊壘布置嚴密並不少懈僞侍王一股又窺伺太平金柱專圖進攻各路賊勢尙未窮蹙遽冀其獻城乞降酌理準情未敢憑信至自拔來歸不得妄加殺戮臣亦曾納降數次未敢輕於屠殺此次欽奉諭旨尤當嚴禁軍士私取財物申明約束以導向化之路又奉諭旨飭令壽州防兵未可輕動並垂詢苗練是否不至另生枝節臣查苗黨擄殺湘軍樵採勇夫

毀端漸開時僧格林沁正撫苗勒捻給以餉項苗黨則痛詆楚師大肆簸弄臣恐因剿撫兩歧以致南北不和適值北岸和含巢三城並陷遂將壽正防軍撤出騰挪赴援明示以坦然不疑正冀其幡然自悔見在事隔兩月該練尙無據城以叛之迹或者感北軍撫馭之恩無湘勇偏處之嫌不至更生他變如果反覆無常逆迹明著臣與李續宜之兵自度剿髮匪則不足制苗練則有餘不足深慮又奏諭旨垂詢楊岳斌彭玉麟二員中能否派撥一員駛赴下游江面駐紮防剿臣查楊岳斌防剿金柱關以備東壩駛出之賊船彭玉麟駐守裕溪口以備巢湖竄出之賊股且下自金陵上至九江節節皆有師船設防上游方戰爭不息實不能移紮下游江面上諭金陵城外各賊壘見尙死力抵拒各路賊勢如僞忠逆侍逆等均尙未卽窮蹙原難遽冀賊之獻城乞降其中如有自

按來歸者該大臣自必能嚴禁屠戮以爲隨時解散之方也壽正防軍之撤原屬移緩就急見在該練尙無據城以叛之迹或係因僧格林沁之軍勦擒亳州相離尙不甚遠自足以資控制惟將來僧格林沁一移他處則苗練無所鈐束勢必又生枝節該大臣等總宜豫爲之所設法散其黨與使日後不能再有反側方爲妥善李世忠桀驁未化朝廷亦所深知該大臣所陳委曲優容各節具見苦心然亦不可不隨時量爲裁制滁營餉銀子藥等件固宜陸續接濟若如那勒豐阿等遣撤官兵被其卡員阻行毆斃等事亦未可專事姑容李世忠爲部眾所蒙蔽尤當使其早自警省以爲保全著曾國藩嗣後察看如該提督有必須加懲究之處著卽據實奏明辦理所稱上游水師楊岳斌等各備巢湖東壩之賊不能移紮下游自屬實在情形均如所奏辦理外國銅冒自來火既飭

工匠試造即可於造成後飭令各營演放熟習以利攻勦另片奏近日各軍情均已覽悉韋志俊進攻青陽既未得手朱品隆之軍由池州繼進著卽飭令迅克青陽以期次第掃蕩太平石埭等股賊氛俾金陵之賊羽翼漸除庶可徐圖進取將此由五百里諭令知之○癸丑諭多隆阿撥兵赴西安協剿並飭瑛棨籌餉接濟○甲寅諭內閣前因升任給事中林壽圖奏參福建藩司裕鐸等狎妓荒謔等款前任閩浙總督慶端含胡覆奏一味欺飾諭令耆齡等秉公審辦嗣又據御史朱潮奏參捐局委員章琮等營私舞弊並曾國藩奏遵查慶端袒庇私人聲名甚劣復經諭令耆齡等嚴密查參茲據奏稱藩司裕鐸等在紳士姚鏡圖家狎妓飲酒一節據妓女翠英優人秀林先後指證確實其捐務積弊查出官吏分用部飯火耗銀兩各情請分別革審監追各等語此案藩司裕鐸

等被參貪劣各款或供證確鑿或案據分明該官吏等猶敢飾詞
強辯顯係恃符狡展若不從嚴懲辦何以肅吏治而整紀綱除章
琮李鼎胡斌朱仁來埵屠堃姚鏡圖業經革職外解任藩司裕鐸
候補李翊宸興泉永道秦金鑑候補知府陳謙恩王慶成知縣王
柄曹學偉著一併先行革職交耆齡徐宗幹提同全案人證嚴行
審訊務得確供按律擬辦至章琮陳謙恩等尤爲刁健並著加以
刑訊至該員等侵吞捐項銀兩著照耆齡等單開各數著落追賠
其劉翊宸秦金鑑應追之款既據聲稱設措完繳卽責令迅速繳
清其始終玩抗之章琮朱仁來埵李鼎曹學偉陳謙恩書吏林玉
堂等並著照例監禁勒限一箇月如數追完丁憂道員司徒緒英
樸丁憂革員屠堃均已各回旗籍並著該部行文該旗籍查取親
供咨明福建歸案辦理並將屠堃解往福建勒追應繳款項杭州

將軍前任閩浙總督慶端任用私人多方袒庇於屬員荒淫飲譙
侵利營私毫無覺察迨經降旨交查仍敢代爲徇隱實屬欺罔著
交部嚴加議處尋議慶端應照溺職例革職從之○諭議政王軍
機大臣等崇厚奏賊勢鴟張連日追剿情形一摺另片奏飛催宋
懌詩來營調遣等語張錫珠股匪竄陷武邑經姜國仲等飛軍進
逼收復縣城該匪向東南竄走馬匹甚多行蹤飄忽全賴馬隊官
兵追躡乃薩薩布所帶馬隊六百名不遵該副都統調度被匪衝
散若不申明紀律奚以整飭戎行著崇厚成保確查此次接仗首
先逃遁之將弁及不遵號令之官兵卽在軍前正法以肅軍令大
名鎮標兵在何處滋事崇厚自應將約束不嚴之該管官據實參
奏並將首先滋事之兵勇查拏正法毋得稍涉寬縱宋懌詩回東
省後譚廷襄前有調赴淄川之奏見在直隸防剿喫緊著照崇厚

所請准其催調來營並著譚廷襄速飭宋憬詩趕緊督隊起行惟宋憬詩降眾與張錫珠本係舊夥安知張錫珠不與之通信糾合惟在崇厚詳加審度察看其實能出力與否隨時妥爲駕馭毋稍大意布特哈等馬隊天津洋槍隊計先後趕到兵力不爲不厚該署督務當激勵諸軍及各路團勇分投截擊盡除醜類通賊貽誤縱兵搶掠之王恩第李鴻垣伊綿阿等並交查之案該署督當迅速遵旨分別嚴行查辦以懲其餘豈可延緩姑容致玩法者毫無儆懼昨據寶山奏已自古北口起程著該署督迅卽飛催前進俾得會同祝壇辦理軍務將此由六百里各諭令知之○諭洪毓琛奏郡城防守麤定見擬先靖近城各路再剿彰逆一摺臺灣匪徒猖獗彰城尙被匪踞嘉義及郡城時形喫緊必須添兵濟餉方足以資攻剿前已諭令耆齡徐宗幹迅飭曾玉明吳鴻源諸軍厚集

兵力進攻彰化保全嘉義肅清臺境著該督速飭該總兵等督率
兵勇會合前進力圖掃蕩如兵力不敷卽添撥內地官軍迅速渡
臺以資剿辦至臺灣餉需並著該督等趕緊設法籌濟洪毓琛見
在郡城一切籌防及餉項事宜仍著悉心籌辦就見有兵力分投
攻剿不得專待援師致匪勢日形猖獗將此由五百里諭知耆齡
徐宗幹並諭洪毓琛知之○詔沿海總督及曾國藩等各舉堪勝
水師總兵人員○以張銓慶爲福建布政使

由記名
道遷

○以克復廣

西蓮塘出力賞副將黃仲慶巴圖魯名號道員易泰守備謝繼貴
花翎餘升敘有差○乙卯以孟春時享 太廟 上前期親詣行

禮○諭議政王軍機大臣等多隆阿奏移營進偪賊巢並興安府
城被圍甚急各情形一摺多隆阿自抵同郡後督軍疊破賊營回
眾技窮屢次上稟求解並有投賊之鮮玉農哈連陞先後遞稟乞

和多隆阿分別批斥所辦甚是見在王閣村羌白鎮附近賊營均被官軍焚毀該匪勢已窮蹙著卽激勵諸軍乘勝進攻老巢將陝省東路各匪次第削平其涇陽咸陽各回巢自不難迎刃而解瑛榮將新募四營畱省防守該撫務當內察奸細外悍逆氛毋得有名無實髮逆陳得才等竄撲興安府城有賊營四十餘座郡城勢甚危急多隆阿進偪回巢正當喫緊恐難親督兵勇前赴興安著仍遵前旨酌派勁旅交馬德昭統帶由子午峪迎勦曹逆節節掃蕩馳解興安之圍瑛榮務當催令馬德昭兼程前進馬德昭亦當振刷精神力圖報稱興安毗連楚境梁作楫等自應就近馳援著官文嚴樹森嚴飭該道員等懷遵疊次諭旨迅卽繞出賊前遏其北竄仍應派得力將弁會同興安兵勇力解城圍如該員等遷延不遵定當從重治罪並將官文等嚴行懲處漢中藍逆未除甯陝

復有川匪滋擾著駱秉章速派知兵大員馳赴陝境先將曹逆殄除相機援剿以助陝省兵力之不及川陝唇齒相依諒該督必不稍分畛域也多隆阿另片奏請將戴鸞翔祥恩解交刑部嚴訊治罪等語著多隆阿派員將該革員等解赴山西省城交愛仁王茂蔭就近嚴訊至前交多隆阿查辦之案類似祥恩戴鸞翔者如多隆阿亦因軍務紛繁難於兼辦並著一併移交愛仁等嚴行訊辦至閻丕敏施鵬二員罪無可追著多隆阿於審明後卽行正法解王農前經投賊甚屬可惡哈連陞在潼關紮營被賊擄去朝廷方深惋惜謂其必能夠節不料此次尙列名遞稟求撫如此稟非出自逆回捏造則哈連陞之甘心從逆百喙難辭實屬罪不容誅著多隆阿訪查確實再行具奏將此由六百里各諭令知之○諭多隆阿自接辦陝西軍務以來覽其所奏畱心體察該大臣於陷陣

衝鋒頗有將才而於諸事未能通籌全局卽如勝保所部固多桀
驁不馴之輩亦當次第遣撤乃旬日間遣歸兵勇已至七起之多
卽不免操之太蹙見在成事不說以後必須事事謹慎方能膺茲
重任該大臣身在行間於辦理文案未能親自料理必得公正和
平能顧大局之員方可與之參酌軍務辦理合宜否則執持偏見
甚至倚勢作威口中之所念或非奏牘中所書該大臣尤不可不
防其弊務當隨時與官文嚴樹森相商訪求正人辦理文案斷不
可先橫成見於胸偏聽獨任致有僨事見在督軍進剿前有强悍
逆回後無策應勁旅內防疑貳之兵外虜勾結之捻必須謀定後
動計出萬全該大臣前在楚皖均有威望然當時尙有官文等爲
之調度故能樹立勲名見在獨當一面尤應虛懷集益不可稍存
自是之念一切顧全大局不可意存見小稍自滿假朝廷於該大

臣拔自行閒界以統帥不憚諄諄教誡庶幾廓清全陝早奏膚功儻該大臣自謂身爲統帥高自位置驕矜自滿則何以克當名將該大臣當時引勝保以自儆省本日據該大臣奏稱目不交睫者三十餘日自因軍情緊急寢食俱廢然該大臣爲國宣勤膺茲鉅任亦當倍加愼重以副愛惜成全之意將此由六百里密諭知之○諭前因多隆阿奏副都統祥恩有寄頓勝保貲財情事該將軍遵旨派員前往查訊祥恩輒將派去員弁毆捆當經降旨將祥恩革職查鈔交多隆阿嚴訊復因道員戴鸞翔在勝保軍營舞弊將該員革職歸案審辦茲據多隆阿奏該二員屢經研訊堅不吐實請解部嚴審等語本日已諭令多隆阿將該二員押赴山西並將原案供招一併移送卽著愛仁王茂蔭秉公嚴審確情按律定擬具奏祥恩戴鸞翔均係業經革職之員如再堅不吐實著卽以嚴

刑審訊將此諭令知之○丁巳諭內閣前因耆齡及御史華祝三先後奏參勞崇光任用非人調度乖方各款當交穆克德訥羅惇衍查覆所參均非無因旋以該前督久歷封圻受恩至重諭令查明覆奏經該前督將被參各款逐一覆陳並自請嚴議復經諭令晏端書崑壽再行查辦以期平允嗣據勞崇光先後將販私行劫之陶昌培章昇耀等遵旨正法及晏端書奏遵查釐金積弊將分肥說合之知縣許慶塔劉承緣等降旨革職提訊並以勞崇光任用非人照部議降三級調用茲據晏端書崑壽奏查明勞崇光覆陳各款如所參該前督將參將卓興調往平遠以致信宜失陷及悉索廣東財賦以應攻潯軍需各條實因另股賊匪竄陷平遠潯梧爲東西兩省咽喉並非調度乖方虛糜帑項又副將潘其泰屢著戰功實非庸懦嗣在高州剿匪未能得手業經勞崇光撤回亦

未姑容其克復梧州保舉各員均照總局及各原稟所敘列會同
崑壽等參酌去畱並無不實候選道馬逢亨捐貲一萬四千餘兩
經勞崇光奏保雖訪查尙無拜認師生確據而原保未免過優應
俟另案訊結再奏又該前督於商捐京餉及京倉要需並無私自
侵那任意稽延情弊詳加訪問勞崇光所陳各情尙無隱飾所有
該前督自請嚴議之處可否免其再議等語勞崇光被參自陳各
款既據晏端書等查明並無文飾該前督既經降調卽著免其再
議其廣東釐金事務著晏端書嚴剔弊端實力整飭未結各案仍
著速行審結以免稽延○諭議政王軍機大臣等景綸奏流匪竄
入山場嘯聚分兵剿辦一招熱河朝陽流匪葛城澁等竄至三姓
黑背地方復突至城南烏斯渾屯搶掠焚燒聚集至四五百人裹
脅商民至數千名該將軍副都統何以並未陳奏直至滋蔓難圖

始行調兵剿捕實屬形同擧瞶著嚴行申飭景綸見派佐領常喜等帶兵馳赴阿勒楚喀三姓一帶會同富隆額及富尼揚阿所派官兵會合攻剿著卽嚴飭帶兵將領實力剿除務將首匪殲擒不准一名漏網如兵力尙單卽由景綸等添派兵勇馳往合剿以期迅速藏事至賊由三姓地方糾眾潛匿富尼揚阿養癰貽患尤屬咎無可諉儻再不能奮勉剿洗力圖自贖恐難當此重咎也三姓等處與黑龍江所屬地界毗連並著特普欽派兵一面嚴扼要隘杜其紛竄並一面會合吉林官兵實力剿捕不得以未經闌入本境意存畛域任令延蔓將此由四百里各諭令知之○諭崇厚奏匪蹤紛竄連日截擊已遏北犯一摺賊蹤剽疾自武邑以至阜城景州所過又數州縣並未大受懲創官軍從後尾追究能殄除幾許如果賊之所到兵團前截後追使賊不容喘息則裹脅日見其

少堵剿亦易爲功著崇厚卽速赴棗強嚴扼北路並嚴飭姜國仲等及催提天津洋槍隊各路兵勇乘勢痛加剿洗一面檄諭各屬團練四面兜截務將此賊就地殲除毋再任令肆行奔突景州西南與山東德州臨清壤地毗連著譚廷襄派兵堵遏飭令所屬文武激勵團勇與直隸兵團齊力兜剿不得任賊伺隙蔓延亦不得以驅賊出境遽爲了事宋憬詩由東赴直並著催令迅率所部迎前攔截奮勉圖功聞直隸肥鄉縣知縣楊毓楠人甚出色永年縣知縣謝恕縱賊殃民雞澤縣知縣高樹庠餽賊銀兩當此地方有事之際尤應分別勸懲均著崇厚卽行確切查明具奏遮克敦布何以不將王恩第迅卽交出可見其通賊等情必係的實著崇厚懷遵前旨嚴行提訊卽於軍前正法該署督前奏薩薩布馬隊在王家莊被賊衝散而姜國仲等卽於是日在該處擊賊獲勝何以

彼此勝負兩歧是否分路並進抑有臨陣不相援應等情著崇厚訪查據實陳奏將此由五百里各諭令知之尋奏楊毓楠盡心吏治惟謝恕縱賊殃民請先行革職查辦高樹庠並未餽賊銀兩業因失守城池參革俟彙案查辦得旨謝恕著卽革職○戊午諭內閣李鴻章奏審明藩司受傷出城從重定擬一摺已革前署江蘇藩司候補道蔡映斗於蘇州失陷後潛逃出城疊經奉 旨拏問交前任巡撫薛煥嚴訊按軍律定擬具奏茲據李鴻章奏稱該革道於逆賊攻陷蘇城時巷戰受傷遇救出城雖與棄城潛逃者有間究屬守禦不力應比例從重問擬發往新疆效力贖罪事犯雖在恩詔以前不准擬免等語著刑部覈議具奏○諭毛鴻賓奏查拏土匪生擒首逆等語湖南南路土匪侯瀆隴隨同粵逆洪秀全起事旋復折回湖南糾結夥黨經前任江蘇按察使陳士杰訪查

明確卽派把總周世烈等將侯潰隴並逆黨吳觀保一併擒獲解營正法其僞統戎曹翦子等亦經陸續弋獲並將蔣木生餘黨馬華華等擒斬多名辦理甚爲妥速未獲各犯仍著該撫嚴飭在事各員趕緊緝拏以清餘孽而靖地方○諭議政王軍機大臣等瑛棨奏探聞興安府鎮兩城於上年十二月二十等日先後被髮逆攻陷覽奏曷勝憤懣見在咸陽喫緊曹逆竄踞江口另股回匪竄入鄆縣省垣糧道梗塞拏獲奸細譯出回教番書又有約期攻撲省城之語據該省紳士李宗沆等公懇暫畱馬德昭仍駐省垣以滋保衛經瑛棨錄呈具奏權衡緩急不能不俯允所請馬德昭著准其暫畱西安所有省城防剿事宜著責成瑛棨會同穆騰阿馬德昭實力籌辦至興安南通楚蜀北接省垣若該匪盤踞日久必與曹逆勾結蔓延漢南爲患甚鉅是剿辦興安髮逆又刻不容緩

馬德昭既不能帶兵出省仍著多隆阿抽撥兵勇派明幹大員統帶由子午峪迎剿曹逆遏截北竄之路力保省垣再行相機進剿並著官文嚴樹森嚴飭梁作楫等趕緊馳赴興安力圖收復該道員驅賊出境並不跟蹤追躡以致興安被陷本有應得之咎儻再不知奮勉卽著從嚴參辦鄖屬帶兵將領均係鎮道大員彼此不相統屬未免意存推諉官文嚴樹森相距太遠亦恐呼應不靈卽著察看情形如必須該撫前往調度卽著嚴樹森迅赴鄖陽督率諸軍越境援剿儻該撫不能親往務須於派出帶兵大員內責成一員統率以一事權據瑛瑩奏毛震壽勦辦漢南賊匪一時恐難嚴事等語毛震壽所部本係川省兵勇卽著駱秉章速派知兵大員來陝接辦漢南軍務仍遵前旨酌調勁旅會同曹逆以濟陝省兵力所不逮西安無賴回民既有句通外匪之信著穆騰阿瑛瑩

馬德昭隨時嚴密查察相機妥辦城外糧道馬德昭務當督率兵勇設法疏通毋爲該匪所困多隆阿進攻王閣村等處同巢計可得手仍著隨時兼顧省垣以副委任雷正綰督軍援陝有幫辦軍務之責著激勵將士進攻咸陽一帶同巢牽制賊勢一切進止機宜多隆阿當隨時與雷正綰往返函商推誠相與切不可各存意見貽誤大局將此由六百里加緊各諭令知之○李鴻章奏查常昭被圍降眾堅守臣曾派常勝軍乘輪船由上海前往助剿俟行抵福山原擬換用小船上岸詎該軍未到以前江陰楊庫大股賊匪繞竄福山分布各口阻我進路臣復商請署提督黃翼升統帶水師出洋協助並派編修劉秉璋督催常勝軍五百七十人添調輪船一隻仍赴福山各口會同黃翼升等相機攻奪要口以期直達常熟臣先密派守備劉增壽馳赴常昭探信該弁回報潛入賊

館親見僞忠王等帶領賊眾晝夜分門攻擊自被圍後周興隆駱國忠兩將分駐城頭及城西虞山固守賊中傳言官軍進攻太倉僞募王又率大股赴太協守臣聞信卽飭總兵程學啟親督八營進紮太倉崑山交界之望仙橋安亭等處總兵郭松林亦督八營進紮太倉南路之外岡鎮李鶴章復帶五營由嘉定繼進臣又檄調副將夢鶴梁安邦等進六渡橋等處又令奧倫李恆嵩帶常勝軍二千餘人由松江徑趨太倉據報各軍行抵外岡業與程學啟李鶴章會商進剿部署已定忽大雨如注連日不止寸步難行常熟望救之切勢難久待稍霽卽當併力進戰如可攻克太城卽與福山一軍前後聯絡冀牽援賊之勢而結降眾之心上諭當昭周興隆等殺賊獻城上海官軍爲崑太兩城所隔不能聯絡駐守本屬可慮該撫見派程學啟李鶴章等分路進紮太崑交界之望

仙橋等處著卽督飭各軍嚴密扼剿並設法援應常昭奧倫李恆
嵩帶常勝軍由松江徑赴太倉與程學啟等會商進剿著卽將常
勝軍妥爲籠絡並飭令我軍將士和衷共濟務將太倉攻拔與福
山一軍前後夾剿方可以擊援賊之勢而解常昭之圍福山各口
關繫緊要著卽督令黃翼升統帶水師並派令劉秉璋等督催常
勝軍添調輪船會合鞠耀乾等各部攻奪要隘力遏賊氛並著都
興阿飭令吳全美等添撥師船會合夾擊富明阿旣赴下游查看
卽著隨時相機策應毋稍貽誤將此由六百里各諭令知之○諭
毛鴻賓奏遵籌赴東將弁並收復蓮塘各一摺湖南距東較遠若
募勇成軍需費浩繁不如就地取材卽著飭令丁寶楨揀派文武
將弁由湖南酌給行貲攜帶赴東募勇訓練見在東省軍務毫無
起色丁寶楨旣久歷行閒務令剋期前赴新任至江忠義一軍前

因皖南北軍情喫緊諭令率所部赴皖嗣據毛鴻賓奏派席寶田東下已降旨令江忠義署理廣西提督篆務見在潯州軍務尙未肅清江忠義仍著赴粵以專責成鄧子垣等一軍粵西是否尙有應勦之賊著毛鴻賓張凱嵩籌商妥協再酌量遣留毛鴻賓能顧大局該省紳民亦能以公事爲急均堪嘉尙其蓮塘善後事宜按捕餘匪清查戶口追繳器械乃地方官應辦之事卽著張凱嵩派委幹員妥速辦理其查辦土匪案內之舉人李波卽李博身厠科名勾通逆匪務須緝獲重辦以申國法將此由六百里各諭令知之○以吳廷棟爲大理寺卿調丁寶楨爲山東按察使以張集馨爲陝西按察使

已革江西布政使

○予廣西陣亡參將李澤明祭葬世職

○已未諭內閣前因御史劉其年奏裁減河工經費並請將河東河道總督一缺裁去降旨交張之萬詳細妥議具奏茲據奏稱河

東河道總督一缺兼轄兩省黃運河工關係非輕未敢率議裁撤俟詳加體察再行奏請惟南岸所屬四廳北岸所屬三廳河道均已乾涸各廳員一無所事均可裁撤所有山東所屬之曹河曹單二廳著山東巡撫酌量辦理其河南所屬之南儀儀睢睢甯商虞曹考五廳著照該撫所請卽行裁撤並著該部援照河南裁缺成案查議具奏○諭議政王軍機大臣等前因熱河朝陽流匪竄至三姓搶掠焚燒當經諭令景綸等會同特普欽派兵會剿茲據景綸等奏匪首葛城渥等糾匪萬人分路撲城經佐領凌祥等督兵截擊副都統富尼揚阿督率兵勇接應葛逆身受重傷逆勢不支向南敗走四散等語此股賊匪前據景綸等奏聚積四五百人裹脅至數千人此次奏稱約有萬人是其嘯聚日多一日雖官軍接仗小勝而匪眾四散仍未大受懲創該處山勢雜沓賊匪最易蔽

匿著景綸瑞麟特普欽懷遵前旨督令派出兵勇會同甯古塔阿勒楚喀副都統一體進兵跟蹤追躡入山窮搜並飭令各該地方官督率兵團次第剿捕查拏毋令日久蔓延吉林三姓與昌圖毗連該匪業經南竄設被闌入盛京根本重地又復喫重著玉明迅卽豫派得力將弁督帶兵練實力扼剿與吉林黑龍江官軍會合兜拏毋畱餘孽將此由五百里各諭令知之○僧格林沁國瑞奏臣等自上年十二月間疊次進攻馬村橋擒首蘇添才賊巢該逆恃有跨河南北兩圩牆高壕闊抵死抗拒我軍屢用炸礮轟擊將南圩房屋燒毀殆盡復於本年正月初一初二等日督帶馬步兵勇礮位繞至河北攻打北圩將房屋然燒所存無幾初四日移營進逼初六日先用炸礮轟擊圩中賊匪稍亂我軍乘勢攻進殲斃賊匪多名餘眾勢不能支旋向南圩逃竄遂將北圩平毀乘勝環

攻南圩復於夜間襲其不備賊眾驚亂兵勇乘勢填壕攻入該逆
向東逃走兵勇在圩內搜殺多名至竄出之賊經營總常山保等
分路追擊斃賊百餘名遂將南圩全行平毀惟永城南界唐家寨
岳家集等處賊圩尚多欲節節前進必須先清後路方爲穩固俟
將唐家寨等處剿除後卽相機進剿擒首魏濟沅前赴宿州投誠
經該州知州英翰飭令薙髮派人押解來營臣等查看情形尙屬
真心歸正遂令仍回宿州殺賊立功贖罪其長城賊圩經黃國瑞
德楞額等軍往攻尙未得手見擬先清附近賊圩以孤長城之勢
然後併力圍攻以期盡殲醜類上諭此次僧格林沁督軍攻毀
蘇添才馬村橋擒巢卽移營皮橋擬進攻唐家寨先清後路以期
節節進逼所籌甚合機宜惟蘇添才尙未擒獲著僧格林沁督軍
殲除毋任死灰復燃張落刑窮蹙思竄實在意計之中該大臣務

當嚴防不令他竄方爲妥善李城股匪竄至山東日照經該地方官督勇迎剿該匪全股竄回著偕格林沁嚴飭德楞額等認真攻剿毋任紛竄儻譚廷襄布置未妥則罪無可追如德楞額挾嫌坐視亦責有攸歸文彬本係初任之員所帶之兵恐難獨當巨捻德楞額不得稍涉推諉其長城圩著譚廷襄責成黃國瑞迅速殲除張錫珠見由武邑竄近景州崇厚督兵堵剿德州相距甚近著該前撫飭令該州文武帶勇集國會同直隸官軍夾剿以期剋日肅事雷鳳鳴既與宋憬詩積不相能准其調至兗州軍營務當妥爲駕馭毋稍大意將此由六百里各諭令知之○諭張之萬奏直東寇氛擾及北鄙飭各軍會同地方兵練扼剿各摺片陳逆疊經官軍痛剿負隅固鎮此次潰圍而出計窮勢蹙當不難力圖剪除著張之萬嚴飭張曜等跟蹤追剿擣穴擒渠以清巨患並著咨會楚

省官軍兩面夾擊肅清南圉至河朔一帶據該撫奏稱自楊長春等擊退邯鄲竄匪後該副將回紮豐樂鎮惟直境匪徒肆擾臨漳一帶伏莽尚多難免不互相勾結仍著飭令該副將會同該地方官嚴密搜捕毋畱餘孽將此由五百里諭令知之○命阿克敦布等明定熱河所屬蒙古地畝差項章程○廣湖南衡山縣學額一名○予河南陣亡副將周見思祭葬世職○庚申諭內閣翰林散館應科均用詩賦考試因近來積習相沿專於研揣聲律不求實學前經降旨自癸亥科起庶吉士散館改詩賦爲策論原期講求實用培養真材茲據御史陳廷經奏稱歷代取士法制屢更行之既久莫不有弊惟在用法得人不必遽改定制庶常散館嗣後仍請用詩賦等語翰林院爲人才淵藪膺是選者平日於古聖賢經史性理讀書果能講明切究身體力行自然學問優長體用兼備

發爲策論既不同陳言勦襲作爲詩賦亦不徒競尙聲華該庶吉士等必應兼擅其長始爲名實相副著自此科爲始嗣後遇散館之年該衙門於先期一月具奏請旨於詩賦策論兩項內不拘何項出題考試該庶吉士等仍當研求經術修明正學求爲本末兼賅之士俾詞章經濟相輔而行用副朝廷樂育英才至意○諭議政王軍機大臣等有人奏崇厚庸劣畀以重任難期得力一摺直隸地面軍務緊要前因劉長佑一時未能卽到令崇厚暫行署理總督原以畿疆軍務不可一日無人督辦責任綦重茲據奏稱崇厚聲名甚劣歷任通永各道甚屬平庸升任運司及升侍郎駐津後亦多劣蹟倚任春霖及劣弁郭文奎等於海防並不認真操演查辦許誦恆之案一味彌縫如籌通商則見輕外國辦釐金則提保官階節壽陋規多至數倍並收買部民之女爲妾等款如果屬

實均干例禁雖屬權任畿疆必致徇私妄作見在董恂已赴天津接辦三口通商事務著卽按照所參各款秉公確切查明據實具奏原摺著鈔給閱看將此諭令知之○左宗棠奏自官軍進攻龍游湯溪全浙之賊亦併力西趨堅圖抗拒湖紹兩郡賊首僞戴王等各率其黨腐聚金華自城西連營數十里其新昌嵊縣諸暨浦江各縣之賊與蘭谿踞匪會合亦連營數十里十一月十三至十二月初十等日龍游各營截擊城壘潛出之賊約共斃賊數百名其蔣益澧劉典各軍圍攻湯溪蘭谿等處自十一月二十二至十二月二十一日一月之中疊有擒獲官軍因攻壘未下亦有傷亡見在龍湯之賊接濟早斷勢難久存惟局勢有不容不慮者賊勢西趨雖圖解龍湯兩城之圍然其詭計則似恐官軍由西而東日進日偏妄思乘閒西竄爲出死入生之謀見在甯波官軍漸偏曹

娥江距紹興府城僅五十里而該逆未嘗回顧是其注意西竄已
可概見臣軍以江皖爲後路蘭谿之賊可由壽昌閒道出常山而
入江亦可由遂安而入皖金華之賊可由松陽遂昌出江山以入
江亦可由龍泉以入閩此數縣者斷難任其侵軼惟有勉力圖維
隨時咨商閩浙督臣江西撫臣力保完善之區 上諭見在龍湯
之賊接濟已斷不能久存著左宗棠督飭蔣益澧劉典等軍乘勢
進攻毋稍鬆勁該逆等注意西竄欲鈔官軍後路不可不嚴爲防
範常山江山等處路路可通著卽飛咨閩浙總督江西巡撫一體
派兵嚴防左宗棠亦應豫爲部勒於江皖道路嚴密布置毋任乘
閒竄突甯波官軍漸逼曹娥江距紹興府城僅五十里如漸逼漸
緊該逆等亦未必不分兵回援該撫務當激勵中外各軍實力進
剿以牽賊勢近日軍情仍著隨時馳奏以慰廬系將此由五百里

諭令知之○予浙江殉難副都統傑純祭葬世職建祠並知縣吳寶豐祭葬世職入祀昭忠祠○予浙江陣亡參將王浮龍祭葬世職○辛酉諭議政王軍機大臣等崇厚奏賊竄東境分兵越境追剿一摺此股賊匪自王家莊武邑擊敗後盡力狂奔官軍從後尾追總未及賊接仗焉能逐漸殲除茲復據奏賊竄棗強邊界復由山東武城境內直奔威縣東南之尖莊乘夜偷渡河東餘匪竄至館陶縣屬之方兒寨一帶意圖抗拒何以賊之所向官軍總未能繞出賊前攔擊而所過州縣亦長驅無阻山東邊界所派帶兵防剿係屬何人竟致賊之所到如入無人之境該地方文武所司何事著譚廷襄查明據實嚴參崇厚訪查明確亦卽從嚴參奏前據遮克敦布繪圖貼說於尖莊河添設礮船見在已將遮克敦布之兵歸祝壇統帶該處有無礮船何員帶領何以任賊渡河著崇厚

譚廷襄一併查明具奏其前次奏報故城及東鹿田家莊等處擊賊出力之團練人等並著查明速卽保奏以示鼓勵此次摺內所稱山東武城境內又被團練截擊奪獲大車數十輛如果實係與賊接仗有所斬獲卽一併查明擇尤保獎毋令掩抑見在賊旣竄至館陶之方兒寨意欲負隅抗拒正可乘此痛加剿洗其前隊騎賊渡過河東見抵何處崇厚已馳赴威縣著卽就見到各營兵勇越境進剿調集各路鄉團在於西北東北兩面兜截並再飛催天津洋槍隊及黑龍江後起官兵迅速圍剿並著譚廷襄飛速派兵嚴飭所屬地方文武調集團勇迎頭攔截與直隸官軍聯絡策應務將此股賊匪就地殲除毋任賊氛分合自如及與各處伏莽勾結再行回竄此股賊匪一日未滅畿疆一日不安賊蹤剽疾異常必須得力馬隊追剿方能制其死命著僧格林沁於所部馬隊酌

量派撥一千或數百名遴委熟經行陣之員帶領星馳前來以利
攻剿方兒寨係賊熟到之地前文煜遮克敦布卽因賊竄該處遽
報畿疆一律肅清旋復任賊回竄又肆鴟張崇厚等如不能將此
賊迅速殲除前車可鑒卽譚廷襄亦不能以賊氛屢入東境任其
來往謂朝廷寬典之可數邀也懷之將此由六百里各諭令知之
○諭張之萬毛昶熙奏擒獲巨捻及追剿陳大澐獲勝各摺片擒
首張瀾林赴營詐降意圖嘗試經張之萬等密飭張曜等設計誘
擒所辦甚妥張瀾林與陳大澐狼狽爲奸張瀾林業經就戮陳大
澐逆勢已孤見經我軍跟蹤追剿該逆逃入土扶橋霍光玉寨內
經張之萬嚴飭張曜等四面合圍毛利熙派軍繞出東面遏賊竄
路著卽督飭該總兵等乘勝攻剿一鼓殲擒若再縱令他竄定惟
張曜等是問尹寨李灣旣經攻拔著該撫等卽責令趙鴻舉余本

初等乘此聲威將東南各寨節節掃蕩務期一勞永逸迅速奏功
張之萬另摺奏河南軍務地方情形所陳吏治諸弊軍務諸難持
論頗見真切吏治一節則曰當用慈祥愷悌之人不用武健嚴酷
之吏軍務則曰俟南圍肅清後擬將全省兵力分爲四軍扼紮陳
州太和等處已得提綱挈領之要惟爲治之道貴能行不貴能言
該撫到任兩月於豫省積弊既能言之厯厯瞭如指掌如果隨時
體察次第施行不倦河南雖係殘破之區無難日有起色張之萬
既經朝廷特簡斷不拘以常格責效目前該撫務當躬行實踐慎
始圖終以副委任勉之望之原摺畱覽將此由六百里諭令知之
○以河南計擒擒首張鳳林賞總兵官張曜翰林院檢討吳元炳
等加銜升敘有差○飭熙麟等迅解烏城及巴里坤協餉○允古
城領隊大臣文祥請墾草湖等地畝升科濟餉○壬戌諭議政王

軍機大臣等都興阿奏查探遠近賊情並富明阿奏遵查沿江情形各一摺常州逆首打造鐵鍊豫辦麻繩火藥綫欲於正月分股攻撲鎮江如江北兵勇過江救護卽乘虛由餘塘等處過江直犯靖泰偽護王等帶賊二十萬已抵金陵之涓化溪聲言由下關渡九洑洲大股下竄儀揚從邵伯直撲裏下河是賊匪情形叵測大江南北均形喫緊鎮江爲濱江要郡馮子材等扼守數年頗著威望著該提督探明賊蹤所向奮力擊剿毋稍疏懈曾國荃大營甫臻安穩該逆大股已抵涓化溪雖聲言欲竄裏下河難保非聲東擊西著曾國藩轉飭曾國荃加意防範該藩司分防蕪湖等處儻賊匪再圖攻撲大營兵力是否足敷防剿並著該大臣悉心籌畫辦理都興阿因江防緊急據奏已咨曾國荃將此次赴援各營兵勇撥回原防並著飭曾國荃察看情形先其所急酌量妥辦上游

和巢官軍擊賊獲勝將來賊勢不支必回竄渡江而儀揚等處必應豫備不虞著該將軍會同富明阿隨時探明刻刻防範毋任紛竄富明阿察看江面已竣布置一切均尚妥協如下游靖泰等處喫緊卽著富明阿親自前往調度富明阿另片奏裏下河抽釐積弊已明降諭旨將知府嚴邈等革職矣該都統於辦理此事甚屬認真可嘉若能將釐局歸併委員裁撤則浮費可減商旅亦便於軍餉民情均有裨益本日諭知吳棠認真裁汰著都興阿富明阿悉心籌酌應如何歸併以裕軍餉之處卽咨商吳棠辦理不必稍存越俎之嫌將此由六百里各諭令知之○諭恩麟奏漢南軍營餉匱兵譁瑛奏省城賊氛緊偏糧道不通各一招毛震壽自上年督兵來陝將鄧逆一股殲除後洋縣失陷迄未攻克雖係餉絀兵單究因該藩司調度未能得力本日已諭令駱秉章酌撥軍餉

解赴漢南接濟仍著瑛榮嚴飭毛震壽激勵兵勇迅圖攻拔洋城毋再遷延致干重咎據瑛榮奏稱省中倉糧將盡譁潰堪虞雷正綰駐紮三原每日派隊運糧接濟成祿軍營不能顧及防剿涇陽見係空城成祿駐此亦屬無益請將雷正綰調回省垣先清附近賊巢並令成祿移紮三原就食等語涇陽雖無居民不可無兵駐守若將成祿撤回三原該匪占踞涇城剿辦又覺費手雷正綰馬步各營應否調回以扼省垣之急著多隆阿察看情形酌量調遣馬德昭一軍見在紮營何處何以瑛榮未經提及著馬德昭恪遵前旨將附近回巢盡力剿洗多隆阿身膺重寄必須統籌全局相機調度省垣關繫甚重尤當妥籌兼顧如果賊勢太盛糧道梗阻馬德昭兵力單薄不敷攻剿該大臣務當先其所急卽雷正綰等不能前往必當撥兵救援儻株守一隅置省垣於不顧設有疏虞

朝廷賞功罰罪一秉大公豈能於多隆阿稍加寬恕耶懷之勉之瑛榮另片奏烏勒興阿常海二員所帶吉林黑龍江馬隊三百餘名因人馬疲乏經多隆阿遣赴潼關調養又有無馬之兵二三百名頗可訓練請飭多隆阿調赴省城助剿等語著多隆阿迅令烏勒興阿常海統帶所部前赴西安以備調遣將此由六百里各諭令知之○諭前因陝西藩司毛震壽在陝南剿賊日久無功疊被參劾諭令駱秉章查明具奏尙未據該督覆奏見據恩麟具奏該藩司以洋縣藍逆衝陷官軍營盤兵飢餉絀貽誤大局稟請奏參治罪察查所稟各情該藩司一籌莫展斷難望其復振而陝南賊勢日熾不可不急易一統兵之將以專責成易佩紳陳天柱名位雖卑其才力是否足以獨當一面或川省另有武職大員可以派往均著駱秉章酌擬具奏藩司關繫緊要如有知兵之員固屬人

地相宜儻一時未得其人但得實心任事之賢員亦可望其勝任
駱秉章素能留意人才著卽迅速奏聞候旨簡放或川省未得其
人卽於該督平日所知可以迅速到任者亦不妨出具考語據實
具奏甘肅回匪滋擾提督馬德昭尙在西安未能赴任而該省總
兵亦俱在各路軍營見委副參遊擊護署難望得力肅州鎮總兵
何勝必巴里坤鎮總兵熊煥章近在川省著駱秉章卽飭該二員
迅帶所部取道白馬關馳赴甘省用資會剿再署湖北提督江長
貴前經給假回籍著該督卽飭迅速馳赴直隸聽候簡用並著傳
諭該提督卽日起程不必俟假滿再行北上至駱秉章所患咯血
是否痊愈老成耆宿中外無多如病體稍痊卽行馳奏用慰廑念
將此由六百里諭令知之尋奏易佩紳陳天柱非統帥才川省無
員可派陝藩緊要知兵者難其人見任臬司吳昌壽官聲卓著王

榕吉明幹有爲前任藩司賈洪詔辦事實心謹就所聞酌舉
三員報聞○諭傳諭護陝甘總督布政使恩麟恩麟奏攻剿靈州
回匪獲勝匪勢窮蹙乞降並甯夏平羅回匪乘間竊發河州回民
悔罪乞恩瀝陳餉絀兵單不得不從權辦理各摺片覽奏均悉道
員侯雲登督兵剿捕靈州賊匪解圍後親率兵勇馳往平羅救援
因未能審度地勢率行前進以致挫敗本有應得之咎惟侯雲登
以文員請署武職尙屬勇於任事非畏縮不前者可比著加恩免
其議處協領拴林等於郭家橋之戰應援遲緩念其併力救護轉
敗爲勝一併從寬免議平羅一帶回匪誤聽流言膽敢肆行紛擾
經侯雲登選派妥弁及回民掌教人等持諭解散已有悔悟之意
著卽責令速將起意滋事及造言煽惑各要犯縛獻究辦如敢抗
違仍應實力剿除毋稍遷就其靈州股匪見旣畏威懾服著責成

定安楊炳銓等查明眞僞分別辦理河州回眾因爭渡啟釁肆意搶掠本應嚴行懲辦惟大兵未集之先已悔罪投誠不無一綫可原著照恩麟所奏飭令崇保等督同在事文武秉公查辦惟該回眾是否眞心就撫總約馬萬祥等跪道哭訴是否出自至誠須詳加體察不可爲其所愚如該回眾不肯縛獻首犯交還據去財物卽著調集大兵痛加剿洗斷不准稍事姑容致貽後患○予甘肅陣亡教諭包叶恒祭葬世職○甲子諭議政王軍機大臣等譚廷襄奏叛匪回竄東境見飭各軍截擊一摺所奏賊由景州故城館陶以至臨清州搶渡擾及堂館之王家隄清水鎮等處與前崇厚所報大略相同本日又據崇厚奏賊由館陶方兒寨竄至邱縣之東目寨經候補道劉策先帶兵追剿賊復竄至臨清州屬之邵家莊見飭各軍進剿等語亦與譚廷襄所奏略同惟賊至邱家莊其

與擾及堂館及冠縣境內之賊是否卽係一股直隸境內見尙有
無餘黨竄匿著崇厚趕緊催提洋槍各隊到齊會合諸軍偵探確
實一面查明具奏一面派兵分路並進痛加剿洗賊旣意圖回竄
北路之防尤關緊要並著嚴密布置毋得稍有疏虞譚廷襄懍遵
前旨速卽派兵迎頭截擊守備馮勝材所部兵勇若干能否得力
著卽飭令與直隸官軍會合夾擊並飭所屬州縣激勸團練四面
堵遏毋再任賊紛竄宋懌詩雷鳳鳴等均願剿賊自效自當因勢
利導惟宋懌詩雷鳳鳴能否認真剿賊著崇厚譚廷襄隨時察看
至宋懌詩見欲添募馬步三千名之多崇厚於鈐制駕馭之法尤
須審慎周詳確有把握方可辦理此輩狼子野心其與張錫珠等
暗中有無句合旣不可知若招之卽來而適爲張錫珠等添其羽
翼狼奔豕突爲害豈可勝言至將來此股賊匪蕩平後宋懌詩等

所部人數過多應如何安插遣散亦須豫爲籌及著崇厚譚廷襄
悉心妥辦毋貽後患王恩第既據崇厚奏稱業已到營卽著崇厚
遵照前旨迅於軍前正法不准稽延時日遮克敦布伊綿阿負罪
尤重著迅速嚴行提訊伊綿阿並不得任令藉病稽延崇厚初膺
劇任務須事事破除情面勉自振刷其李鴻墀丁學易裴福德等
案均卽一一認真查辦薩薩布所部不遵號令之官兵尤應趕緊
查拏遵辦毋稍姑容祝壇業已接帶遮克敦布之兵寶山是否業
已到營並著崇厚飛催前進毋任延緩譚廷襄另片奏湍川進攻
各情其用地雷轟塌城牆外皮等語恐仍敷衍搪塞之詞陳顯彝
既經撤回卽著譚廷襄將該員並吳載勳前次交查之案速行查
辦毋許意存回護吳台朗人甚平常未必知兵譚廷襄委令前往
接辦仍恐不能得力總兵曾逢年日內既可到營卽責成迅速辦

理早拔堅城悉殲醜類李成等股匪伺隙奔突各路兵團迎剿德
榜額等亦卽星夜跟追卽著譚廷襄嚴行催督該已革副都統等
及各文武兵團乘勢追剿蘭費另股棍匪乘官軍追擊李成等股
出巢肆擾見雖截擊回巢尤應督飭文彬奎芳等嚴密堵截並令
知縣王成謙等各軍分路進剿以期埽穴擒渠毋畱遺孽將此由
六百里各諭令知之○諭馮子材魁玉奏蘇常老賊糾合丹陽踞
逆分犯鎮營防勦戒嚴一摺鎮江郡城實爲大江上下游關鍵賊
所必爭之地全恃防守嚴密無隙可乘賊始不得往來逞志昨據
都興阿等奏僞護王等帶賊二十萬已抵金陵之溇化溪意圖下
竄儀揚等處是鎮營江防尤爲喫緊茲據馮子材魁玉奏稱逆黨
三萬屯於句丹兩邑並探有蘇州踞逆遣黨假扮官兵四竄復調
蘇常老賊上犯金柱關見在已有僞懷王等率賊三萬餘人竄踞

句容之荻塘等處又有丹陽踞逆糾黨擾及大港等處陸路三面俱形喫緊與都興阿所奏情形大略相同鎮營以有限之兵當逆賊六七萬眾其勢不可以浪戰該提督等堅守孤城有年自必洞明形勢據奏業經飭令水營先固江防並派總兵田宗揚等將東路羣逆殲除西南一帶因有重賊未便深入並多派偵探覘賊情形俟其臨近而痛剿之進止頗合機宜嗣後該提督等仍當竭力固守雖賊眾紛乘總示以不可動搖之勢如鎮城稍有疏失必惟該提督等是問以後軍情務須隨時與都興阿曾國荃等聲勢聯絡毋稍疏虞將此由六百里諭令知之○諭張凱嵩奏遵查粵西股匪次第辦理情形一摺所稱粵西各處股匪名數與前次劉長佑遵旨查覆情形大略相同該省股匪雖多而平潯兩處尤爲巨患負嵎最久自應先其所急以全力攻拔則其餘各股自無難次

第蕩平張凱嵩所奏各情尙能洞悉機宜權衡緩急見在蓮塘巨股業經剗平潯州踞匪復與賓州橫州永淳岑溪容縣各股聲氣潛通尤宜乘勢分道進兵以收破竹之效卽著張凱嵩照所籌情形次第辦理務先將潯州之賊剗日掃除毋得頓兵糜餉縱令各處股匪蔓延煽惑日久稽誅致負委任至江忠義一軍諭令仍遵前旨赴粵見據張凱嵩奏稱擬俟江忠義到時面商統帶所部直擣賓州賊巢使潯逆腹背受敵茲聞江忠義奉調援皖精捷一軍悉數拔營回楚等語是該署提督之軍仍未遵旨赴粵豈前次所降諭旨毛鴻賓尙未接奉遵照辦理耶廣西兵勇無多江忠義之軍旣克蓮塘自當乘此聲威迅克潯州巨股豈可稍涉鬆勁著毛鴻賓飛咨該署提督剗日赴粵毋少稽延其精捷一軍卽速飛檄阻止以資調度張凱嵩於該署提督到時並著將分道進兵機宜

迅速籌商剿辦以奏膚功將此由五百里各諭令知之○千廣西
陣亡知縣林則璋祭葬世職○乙丑諭議政王軍機大臣等吳棠
奏東匪宋三岡等竄突山東蘭山莒州日照一帶距海州贛榆縣
境止十餘里當咨會富和德楞額就近剿辦並派隊馳往堵剿等
語沂屬賊匪充斥此拏彼竄見將擾及贛榆若不認真堵剿恐賊
蹤竄入則褻下河完善之區均形震動著吳棠飭令派出之參將
張祖雲等帶隊迅赴贛榆嚴密布置以剿爲防不得株守本境坐
待賊來致滋貽誤並著譚廷襄飭令富和德楞額於沂州各軍內
酌撥勁旅就近剿辦富和等在沂剿匪屢次遷延貽誤若再意存
諉卸縱令該匪闖入贛榆卽著譚廷襄嚴參治罪將此由五百里
各諭令知之○實授吳昌壽廣東按察使○丙寅曾國藩彭玉麟
奏據報竄聚巢縣之賊分撲西梁山經官軍剿退後遂踞運漕銅

城牖東關各隘臣國藩所調之蕭慶衍毛有銘兩軍先後馳至議以毛有銘所部嚴備巢縣東關之賊蕭慶衍所部專攻運漕銅城牖之賊臣玉麟令定湘營師船駛抵運漕上游會同蕭慶衍陸師過河築寨未及盡濟該鎮踞賊糾股突出我軍在水次然礮仰轟殲斃頗眾一面令三板數號接渡後濟之軍毛有銘正帶馬隊渡黃落河聞運漕礮聲飛騎助戰賊知不敵敗退歸巢我營修築既成臣玉麟飭曾泗美等向運漕自上攻下親督成發翔等向三汊河自下攻上戰不兩時遂斷浮橋悉焚卡壘賊之搜刃墜河死者無算臣玉麟自三汊河引軍西上知大馬頭一橋二壘亦就毀平蕭慶衍督率馬步等營四面縱火斬隘直入立復運漕一鎮毛有銘復督親兵馬隊出哨東關見賊對河列陣正與曾泗美往來拒敵急派湘右營渡河夾擊斬賊二三十級賊仍縮入卡內堅伏不

出毛有銘知東關未可遽圖不如徑取巢縣爲攻心計乃就各營抽撥勁旅越芙蓉嶺迤邐前進突有五千餘賊在前面山岡撲來毛有銘隨令各營進剿兩鋒相交曾不稍卻繼以馬隊橫掠賊陣賊始披靡我軍奮力追賊馳逐一里許正思撤隊回營詎林木間鼓聲忽起巢縣悍賊擁擁而來彭星占與諸弁勇左右馳突裹入垓心胡得勝陳東祥謝濟偁呂鴻榜李春生等力戰死之彭星占憤怒填臆負傷決戰手刃數賊並歿於陣毛有銘揮飭湘中等營併擊賊漸解退比見劉義勝匹馬衝入中槍而殞該逆仍復回戈轉鬪且卻且前各軍以擡礮猛擊斃賊前鋒數百人乘賊隊散亂之際遂奪獲彭星占屍骸而還其銅城牯之賊於要衝築四卡以阻我陸師又築一水卡以阻我舟師臣玉麟飭令喻俊明成發翔等攻破水旱諸卡隨結小划爲橋渡過陸師全隊肅慶衍令趙太

和等分攻賊壘仍自率中左營爲各路策應天甫向曙諸道並進賊正欲出壘迎拒我軍已環偪壕邊火器飛擲眾勇於列敵中躍過壕溝摩肩而上一壘旣破各壘盡亂駢戮盈千並斬文姓黃姓諸酋水師亦分隊連毀沿隄數卡乘勢進取岷山岡逆壘賊皆惶遽失措踰牆欲遁肅慶衍揮軍直進立焚二壘擒斬尤多遂繞出銅城牖後奮攻石壘等查賊在巢縣廣聚悍黨踞守數隘意在分竄皖北郡縣冀解金陵之圍此次克復運漕進規銅城牖苦戰兩日尙屬得手惜肅慶衍毛有銘兩軍不滿八千人兵單賊眾未能遽行掃蕩見飭諸軍堅守各隘俟春水稍漲再行水陸會剿恢復要區又奏青陽賊眾聞朱品隆一軍趕到池州卽遁歸石埭十二月二十五日官軍將青陽縣城收復賊糾大股六七萬眾窺犯涇縣繞城築壘分踞黃村大坑一帶涇城守將易開俊等擊退撲

城之賊鮑超自甯國疾馳九十里引軍來援會攻附城賊壘連破二十餘座乘勝進兵黃村又毀十數壘斬馘盈萬立解涇縣之圍而羣賊已麤集寒亭清弋江等處勢將圍撲營盤計日內必有數次大戰北岸之賊分踞和含等處守禦甚堅據接獲僞文稱僞忠王見赴蘇州因常熟賊目周興隆等投誠忠逆調集羣賊圍攻常熟不久卽率二十萬眾再犯江北下擾揚州上窺皖楚等語雖未必果有其事而該逆銳意竄擾大江以北殊可深慮又奏臣接奉諭旨詢問知府曾貞幹擊退援賊後紮營何處查臣弟貞幹秉質愚蒙持躬介特爲諸生時不甚肄習舉業頗究心技擊之法咸豐三年帶勇六百人隨臣剿賊旋以臣父年高回籍侍親八年十月因胞兄國華殉難三河荷蒙文宗顯皇帝屢降諭旨褒卹有加痛哭發憤誓出殺賊以雪兄仇而報國恩年來會克太湖潛山安

慶蕪湖獨克繁昌南陵疊蒙

天恩獎敘聞望漸隆而臣弟貞幹

孤懷鬱抑耿耿若不自得常思別樹一幟建立奇功以分聖主

宵旰之憂上年秋閒邁疾羣勸出營調養適以援賊大至力疾督

戰精神遽振日夜不倦臣方幸其病後耐勞或者別立尺寸之功

一償平生之願不料其中道殞折齋志長終臣位高德薄殃及手

足慟惜之餘彌增悚歎而聖主優詔褒卹若深鑒臣弟未白之

衷而曲體臣難言之隱此尤臣所闔門感激存歿霑戴者也上

諭議政王軍機大臣等竄踞巢縣之賊分撥悍黨踞守數隘意圖

牽掣官軍不克進規金陵該逆詭謀百出亟須將皖北踞匪次第

掃除然後會師金陵可期得手見在運漕克復水師計可乘勝進

攻著曾國藩嚴飭諸軍進取銅城牐要隘乘此春水方生水陸並

進圍攻巢縣力拔堅城其相含等處逆匪踞守甚固並著相機進

取毋令乘隙他竄青陽縣城業經收復朱品隆一軍已抵池州軍
威益振圍撲涇縣之賊亦經鮑超率師來援會同易開俊等立解
城圍賊匪麇集寒亭清弋江等處鮑超謀勇素裕著曾國藩飭令
嚴密戒備毋爲該匪所乘僞忠逆調集羣賊圍攻常熟擬率二十
萬眾再犯江北下援揚州上窺皖楚曾國藩接獲僞文與都興阿
李鴻章等先後奏報大約相符著曾國藩都興阿富明阿等仍遵
前旨於江西各要隘嚴密守禦以備不虞該逆既有上窺皖楚之
說並著曾國藩迅卽咨會官文等妥爲布置勿令逆蹤上竄並著
李鴻章速飭各軍進取太倉援應常昭俾該逆眾回顧蘇常巢穴
不暇徑趨江北方爲妥善曾貞幹戰功卓著朝廷方期大用前以
力疾督戰遽焉病故深爲惋惜特加優卹嗣又據李鴻章詳敘該
員戰績入奏復加恩照二品例議卹並准其子諡於本籍及死事

地方建立專祠仍宣付史館立傳諒該大臣手足之痛藉可稍慰
將此由六百里各諭令知之○予安徽陣亡總兵官彭星占湖南
陣亡遊擊蔣仲芳祭葬世職○丁卯諭禁河南州縣苛派○予直
隸陣亡典史李汝南等祭葬世職○戊辰諭議政王軍機大臣等
駱秉章奏遵查毛震壽帶兵攻剿洋縣未能得力瑛棨奏查明斗
山股匪下落隴州回匪來去蹤迹並附陳藍曹等逆竄擾情形各
一摺陝西藩司毛震壽攻剿漢南賊匪日久無功且有縱兵騷擾
情事疊經諭令駱秉章等查奏派員接辦茲據奏稱石逆一股賊
勢蔓延川省兵將不能分撥等語本日已諭令沈葆楨飭江西藩
司李桓馳赴漢中軍營接統毛震壽所部兵勇前因陝南軍情緊
急疊經諭令駱秉章將派赴川北剿匪之周達武等軍就近飭赴
陝南剿辦迄今未據覆奏見在洋縣甯陝一帶需兵甚急他處又

無可撓駱秉章仍當飭令周達武等軍迅速前往交李桓接統以厚兵力毛震壽須俟李桓到後再行撤去李桓未到以前瑛榮仍飭毛震壽認真督剿勿令再事延誤隴州甯陝鳳翔汧陽等處匪勢俱形喫緊已飛咨多隆阿分兵剿辦該大臣有督辦全陝軍務之責務須隨時體察情形處處兼顧方爲不負委任馬德昭既畱防省垣又有穆騰阿在省練習旗兵根本重地當可無虞雷正綰一軍應否調回省垣疏通糧道並著多隆阿酌度辦理近日軍情仍著隨時馳奏以慰廩系與安界連楚省見在楚省無事著嚴樹森卽日出省馳紮秦楚適中之地扼要策應督率梁作楫等軍援陝務將興安府城先行克復節節掃蕩以靖狂氛李桓到尙需時嚴樹森能否卽督楚軍進紮漢中先將毛震壽奏撤飭令赴川聽候查辦之處著嚴樹森酌量辦理該撫夙矢公忠情殷桑梓斷不

稍存畛域之見其應如何詳審局勢外剿內防仍隨時與官文多
隆阿會商妥辦所有出省督剿日期著嚴樹森迅速具奏石逆股
匪自黔滇回竄川境其眾數倍於前劉蓉向來勇於任事曉暢戎
機著駱秉章仍飭該藩司迅赴敘南認真剿辦其由巧家廳闖入
會理州之窪烏司股匪並著飭令該藩司分兵截剿務須就地殲
除勿令竄入滇境將此由六百里各諭令知之○諭潘鐸徐之銘
奏堵擊竄滇髮逆節次獲勝各摺片石逆股匪十餘萬眾分起行
走由黔竄滇至平彝宣威一帶肆擾經宣威州兵練擊退連夜潛
逃欲由東川過蜀其分股竄擾東川逼近郡城之賊亦經兵練擊
退竄至崇禮鄉復經署知府黎德新督同文武追至該處接仗獲
勝惟逆匪人數眾多各處堵剿擊斃者不過數百人於賊勢並無
所損宣威之賊暫時卻退難保不去而復來東川逆眾連亘數百

餘里該處兵練究有若干是否足資攻剿應否添調他處兵練及
得力將弁前往助剿該督撫均應詳慎妥籌不得僅以札飭地方
府營籌防及彙據地方文武稟詞一奏了事滇省閭閻彫敝元氣
未復設粵匪再久踞迤東勢必蔓延益廣辦理更形棘手潘鐸等
務宜厚集兵練迅速殲除不可稍涉大意賊因宣威地方野無存
糧卽連夜逃往東川是堅壁清野之法必當亟行籌辦該署督等
亦宜督飭地方官實力舉行俾賊匪無糧可掠無人可裹殲除自
當較易也參將楊振鵬等辦理安撫及堵剿事宜均屬出力惟大
理撫局尙未就緒迤東髮匪亦未殲除馬聯陞前已經該督等奏
獎此時該二員均未便再給獎敘著卽責成楊振鵬等始終其事
俟辦理實在妥協後再行奏獎至署總兵福陞之子與把總高姓
率眾至法國傳教士人寓所滋事武弁辛姓等搶奪教士物件該

署總兵失於禁約昭通府知府夏廷楫不能彈壓均著先行摘去頂帶福陞之子及武弁土棍均著查明從嚴辦理該教士等被搶物件並酌給賠償銀兩迅行辦結其武員擅殺知縣情形一摺見畱中備覽將此由五百里諭令知之○命江西布政使李桓馳赴陝西接辦漢南軍務○己巳諭議政王軍機大臣等崇厚成保奏擊賊獲勝並請飭王榕吉酌帶兵勇來直各摺片張錫珠股匪竄踞黃金隄一帶經姜國仲余承恩等乘夜劫營餘賊敗竄西北復經余廷楷春霖追至館陶將該匪兩次擊敗並經薩薩布鄧啟元等馬隊迎截追殺河西步賊見已殲除殆盡崇厚成保務宜乘此聲威速將河東股匪盡數殄滅一面嚴扼沿河要隘毋令賊蹤偷渡並著譚廷襄嚴飭在防文武會合直隸兵勇四面兜剿毋任紛竄晉省平定州地方去賊尚遠防務較鬆直省兵力又形單薄著

英桂卽令王榕吉酌帶平定州防所得力兵勇迅速赴直協剿前任大名道劉煦所募勇丁剿捕土匪頗稱得力此項勇丁散居鄉里難保不流而爲匪著崇厚飭令王榕吉酌量情形就近招募令其隨同剿賊以厚兵力直東地勢平衍馬賊倏忽往來無隘可扼惟有挑挖深廣壕溝俾賊騎無可馳騁則鄉團可以隨地扼截兵勇可以立時追及著崇厚譚廷襄曉諭近賊各州縣鄉團迅速辦理王榕吉所遞及劉錫穀稟詞經軍機處呈覽所稱選募順德各屬練勇及籌餉挖壕築隄調團等事均中窾要卽著崇厚斟酌時勢妥速辦理劉錫穀已據崇厚派令管帶練勇卽可盡其所長以收指臂之助將此由六百里各諭令知之○諭劉長佑奏高州等處近日軍務情形一摺據奏高州軍情自上年十月羅定各鄉踞匪敗回信宜後石骨南山大井雙合田各處賊巢添匪愈多出撲

潮勇營盤雖經各勇奮擊敗回勦辦尚未得手羅定化州等匪均未大受懲創是高州等各屬軍務亟須趕緊認真辦理著晏端書等嚴飭卓興方曜等激勵士卒務將逆匪陳金缸信宜老巢設法進攻飛調守備侯勉忠所部連由西甯馳赴信宜擣其後路使該逆腹背受敵聚而殲旃其羅鏡之賊見竄何處化州賊已侵佔州城以及陽春電白各處土匪均卽分飭各地方文武督率兵練就地殲除毋任延蔓將此由六百里各諭令知之○庚午諭議政王軍機大臣等前據駱秉章景紋先後馳奏中膽對野酋工布朗結強占土司地方擾及明正邊界當經諭令駱秉章派員彈壓持平剖斷或懾以兵威俾歛迹歸巢茲據滿慶等奏瞻對夷酋工布朗結糾合德爾格特土司擾及霍爾章谷等土司地方不日由巴塘江卡卽到乍了官覺等處其子東登工布糾眾圍困裏塘正土司

官寨大路橋梁俱被拆毀拆閱文報捆縛通事見經達賴喇嘛等已派番員多帶土兵前往乍了官覺江卡等處分投堵禦隘口並飭三十九族酌帶土兵一千五百人馳赴巴塘駐紮及令戴琿期美奪結馳赴江卡以爲聲援各等語瞻對爲赴藏要道該酋工布朗結任意滋擾亟宜及早辦理駱秉章前派委員直往剖斷是否辦有端緒著卽仍遵前旨迅速妥辦儻或不遵理論亦當懾以兵威川省兵餉雖不敷分撥而土兵尙屬可用卽著酌量情形妥籌辦理福濟景紋前諭迅卽馳赴西藏卽著兼程前進毋許再涉遷延其逃赴西藏之霍爾章谷人眾三百餘竈流離遷徙不肯從逆可嘉可憫卽著福濟景紋滿慶恩慶加意安撫調濟毋使一名失所以示懷柔所稱指地安置之處卽照滿慶等所擬辦理將此由五百里各諭令知之○以存誠爲理藩院尙書

由禮部右侍郎遷

○辛未

諭內閣前因張之萬奏稱訪查知縣殘惡巧滑究出帶兵將弁捏稟邀功各情當經降旨交張之萬併案審辦茲據該撫將該員弁等劣款審明定擬具奏此案河南汝州團首李瞻因辦團派費與富戶彭宋二姓尋仇將該二姓所居之張寨率眾圍困署汝州知州任愷以李瞻藉團滋事稟經鄭元善派令副將楊飛熊帶兵與已革洛陽縣知縣任桂已革汜水縣知縣劉定敷前往會剿任愷佯與李瞻說合旋同任桂楊飛熊將李瞻捆縛並其隨從團眾一併殺害楊飛熊等捏造李瞻執旗開礮任桂率眾迎擊等情稟請將任桂等開復原官至其殺害會元局團練李書聲等一節緣任桂隨同楊飛熊在洛陽剿匪時李書聲等有誤殺商民奪獲銀兩之事楊飛熊聽信營弁稟詞輒以殺兵搶餉情同叛逆派令參將盧得勝會同署洛陽縣知縣徐光第任桂等剿辦盧得勝所帶兵

丁焚掠村莊徐光第任桂復將盤獲之李豹子指爲會元局攻城
內應卽行正法河南府知府厲文煒與楊長春徐光第任桂復將
李書聲等誘至營中斬梟捏報弋獲各等情除楊長春盧得勝業
經另案革職外任桂於會辦李瞻等案冒功開復原官且其代理
偃師縣任內奉調出境聞警不卽折回以致被賊蹂躪實屬罪有
應得著發往新疆效力贖罪楊飛熊捏詞稟報任意殺戮並有不
能禁止勇丁違例演戲情事著卽革職從重發往軍臺效力贖罪
事犯雖在恩詔以前應不准其援免惟念該革員見在傷病未痊
著加恩暫緩發遣畱於河南軍營養傷隨同剿賊戴罪圖功任愷
厲文煒均有隨同捏稟情事咎亦難辭惟該員等平日官聲尙好
均著加恩改爲革職畱任徐光第在洛陽署任內於捻匪竄擾不
能力爲堵禦著與帶勇不力之參將李春華一併革職以示懲儆

劉定敷因會辦李瞻一案開復原官亦屬冒濫仍著革職畱營效力前汝州直隸州知州舒亨熙於彭鳳臺等具控李瞻各情不早訊辦致釀巨案著交部嚴加議處所有李瞻案內保舉之官紳人等著該部查明一併撤銷前任河南巡撫降補道鄭元善於捏稟情節率行入奏亦著交部議處○諭議政王軍機大臣等崇厚奏匪蹤撲滅直省肅清並密陳東省隱患請飭僧格林沁等帶兵馳剿各一摺此股匪徒節據崇厚奏稱連次殺賊名數並不甚多何以遽能淨盡該署督務當認真剿辦毋得任聽州縣稟報之詞敷衍了事致貽後患其竄擾河東股匪見在開圻長壕藉資堵禦卽著崇厚親赴河干督率辦理惟東省兵力不厚該署督當不分畛域越境追剿豈可盡疆自守前諭將遮克敦布所帶兵勇交祝瑄管帶此項兵勇堪用者若干著寶山祝瑄認真挑選並著寶山迅

卽帶赴館陶等處會同東省官兵相機進剿譚廷襄一體嚴飭各員弁聽候寶山調度毋得意見參差以專責成祝壇本係被參撤任之員經朝廷特簡大順廣道自當感激報效著崇厚飭令督率三府守令將該處團練妥爲辦理酌募勇丁加意訓練於向來盜賊淵藪極力搜捕勿得以州縣一粟轉詳了事其沿河一帶鄉團並著崇厚督飭地方官嚴查保甲築寨濬壕妥爲聯絡以輔兵力之不逮寶山赴東以後所需口糧仍著崇厚隨時接濟毋令缺乏僧格林沁見在進剿捻巢正當喫緊之時所調馬隊未能分撥崇厚譚廷襄務就見有兵力分股剿辦不得專待援師至勝保以獲咎大員解京治罪該署督遽請飭赴東省剿賊顯係意存嘗試甚屬非是該署督務當以文煜爲前車之鑒毋專見好於人置公事於不顧致負委任所請保獎出力文武員弁見在首逆張錫珠並

未擒獲亦未將全股殲除何得濫行獎敘著崇厚存記統俟股匪肅清再行請旨酌保再崇厚屢次奏報聲敘殊屬簡畧嗣後務將賊情戰狀詳細具奏不准稍有疏漏將此由六百里各諭令知之○僧格林沁國瑞奏永城東南之張家瓦房乃賊首趙浩然所踞巢穴該犯素與張落刑狼狽爲奸自臣等移營皮橋距該寨六十餘里正月初九日督帶馬步各隊攻其不備趙浩然隔牆聲稱情願投誠卽令伊出見該逆又復遲疑查其圩寨甚爲堅固若以力取難操必勝不如先以計誘因知前經投誠之李加英與該逆係姑表至親遂令李加英前往再三開導趙浩然同伊弟趙欣然始出寨謁見雖稱情願投誠並非真心歸正且該逆係積年巨惡自應明正典刑惟各股捻逆欲自拔來歸者尙復不少若將趙浩然等卽行正法恐各匪乘風疑懼結爲死黨勦撫更形費手當將該

逆暫交歸德府收禁一俟將各擒首擒獲再行盡法處治並飭地方官將唐家寨岳家集孟家樓擒首李大箇孜等處賊寨一律平毀以免匪徒潛匿至童溝集等處擒首田現已經南遁其被脅各圩均已歸正俱令薙髮安業復據探報逆首張落刑遣其族人張振江等率黨數千潛於距營四十餘里之曹家廟等處盤踞意在乘隙來撲已派翼長恩承全順舒通額蘇克金督帶各起馬隊探蹤進剿臣等復督帶末隊殿位繼進馳抵曹家廟與賊接仗斃賊數十名餘匪敗竄回巢張振江等率眾過河南竄臣等正擬移營進攻白龍廟之擒首劉狗賊寨適探擒首孫醜與劉尿卽大老淵劉狗卽二老淵楊二等股率眾由渦河南鹿邑一帶西竄當派翼長蘇克金等跟蹤追剿查該逆擁眾西竄勢必奔赴汝甯句結西路賊匪該處軍務甫經得手未便令其句合當派翼長舒通額副

都統恆齡帶領馬隊千餘名馳往會擊至恭奉諭旨直東股匪竄至館陶令臣等酌撥馬隊千名或數百名以利攻剿原應速撥前往奈因李城股匪竄赴山東擒首孫醜等近又西竄除派出各軍追剿外存營馬隊數百名僅敷防剿臣等再四思維儻富和剿辦李城股匪得早蒞事或舒通額之隊剿除竄匪回營後再行審度南北軍務情形酌量撥調上諭擒首趙浩然盤踞張家瓦房老巢稔惡最久此次僧格林沁督率馬步各隊攻其不備突將該圩合圍該逆勢窮力竭始行出寨投誠自應明正典刑以申國法惟各股擒匪震懾兵威多思反正若將趙浩然等卽行正法恐該匪等聞風疑懼轉堅其從逆之心僧格林沁見將趙浩然等暫交歸德府嚴禁所籌甚合機宜卽著依議妥爲辦理見在直境匪眾悉竄山東館陶一帶該省兵力本弱難望剋日殲除富和及舒通額

等各隊僅能早日蕪事則移剿畿南股匪自必得力並著僧格林沁嚴飭該員等將李城一股及竄豫各匪迅速剿滅不准稍有遷延復致滋蔓陳大禧亡命東奔竄伏阜境之華莊吳老莊寨等處張曜等各率所部合力前進竟使元惡稽誅餘燼復熾實堪痛恨已明降諭旨將張曜等分別懲處矣此時皖捻西趨沈項處處喫緊僧格林沁已派舒通額等帶領馬步隊千名跟蹤追擊卽著張之萬督飭張曜率領所部馳赴沈項扼要堵截並著毛昶熙飭趙鴻舉統率馬步兵勇迎頭堵剿以收夾擊之效豫省千里平衍非厚集騎兵不能制賊張之萬滯陳棘手情形請調東三省馬隊千名未始非策惟自軍興以來東三省馬隊大半徵調遠出已無可撥之隊毛昶熙前次奏請購買口馬抽練騎兵見在所買馬匹尙未入關卽著迅催前進趕緊訓練較之遠調客兵更形簡捷此時

防務緊急該撫等惟當激厲將士聯絡民團就見有兵力實力籌
勦不得藉口於兵單餉絀稍有疏虞至陳大濬一犯尤應迅速擒
獲不准再令竄逸致與毫捻勾結將此由六百里各諭令知之○
諭傳諭陝甘總督恩麟恩麟奏南路勦賊失利一摺楊永魁統
帶官兵二千四百餘員名駐紮近隴州鎮之常家堡正宜督率兵
勇實力勦擊乃據護都司楊天興稟報輕信賊匪詐降之說並不
審察虛實輒行撤兵以致中賊伏陣全軍奔潰而該護鎮則稟稱
連次與賊接仗被賊匪四面設伏官軍失利何以與琿武等先後
稟報均屬不符顯係該護鎮並未奮勇勦匪藉詞粉飾是其喪師
失律之咎實堪痛恨著該護督卽將楊永魁等嚴訊確情按律懲
辦琿武有督辦防勦之責並著嚴飭該署道趕緊收集散亡就見
有兵力幫同新任道員林之望將龍山鎮蓮花城股匪痛加勦洗

力扼要隘如再遷延貽誤卽著從嚴參辦恩麟統轄兼圻責無旁

貸務當振刷精神督飭各軍迅速剿辦毋滋貽誤致干重咎○以

綿宜爲禮部右侍郎

由內閣學士遷

○以河南小王寨剿匪不力總兵官

張曜李續燾分別革職摘頂仍畱營效力○癸酉諭議政王軍機

大臣等張之萬奏追剿陳大禧獲勝並扼堵西竄捻匪一摺陳大

禧股匪遁入阜境吳家老莊經張曜督軍進攻正在得手之際而

皖捻大股已竄至候家寨張曜分軍回顧華莊一面知會余際昌

督隊北來合軍堵剿皖捻大股西來與陳逆互相勾結意圖牽掣

官軍爲餘燼復燃之計張之萬務宜督飭張曜余際昌合力堵剿

將此股捻匪先行擊退以孤陳逆之勢一面飭令尹嘉賓率領所

部嚴防前敵以杜陳逆他竄其由亳州出竄之孫四瞎股匪欲由

朱圩會合前股西竄沈邱境內之紙店一帶亦有賊蹤又欲渡河

北援著毛昶熙趕緊督率所部偵賊所向於商水臨潁一帶扼要
駐紮並著張之萬派兵探蹤迎剿毋令竄入腹地是爲至要前據
僧格林沁奏稱捻首孫醜與劉大老冤二老冤楊二等股由渦河
南岸向鹿邑西竄已派蘇克金等馬隊並舒通額等馬隊陸續馳
往皖豫地方追擊並著張之萬毛昶熙知會蘇克金等前後夾擊
以期力埽兇鋒該撫摺內所稱之阜境是否卽係潁郡阜陽縣境
張曜見回紮之華莊及皖捻所竄之侯家集均係何縣所屬捻首
孫四瞎是否卽係孫醜均著張之萬查明具奏嗣後軍營摺報所
奏地名務將係何州縣所屬一併詳敘以清眉目毋得仍前含混
將此由六百里各諭令知之○甲戌諭內閣穆騰阿瑛棨由六百
里馳奏直隸軍務喫緊請飭勝保前往剿辦一招覽奏不勝詫異
勝保以軍營獲咎革鞫問罪之員生殺予奪朝廷自有權衡穆騰

同瑛榮何得輒爲此請意存嘗試且陝省軍務正在喫緊而瑛榮由六百里馳遞招報並無一字提及該將軍巡撫等於分內應辦公事置之不顧而於瞻庇朋奸代爲乞恩之舉輒敢擅發急遞若惟恐遲則不及者舍己芸人實屬膽大穆騰阿從前在安徽軍營曾經奏請簡派旗員協帶馬隊爲勝保表暴功績蒙 文宗顯皇帝明燭其隱降旨申飭此次復以此等伎倆形諸奏牘亦豈能逃洞鑒耶上年勝保曾爲瑛榮請派幫辦軍務今瑛榮卽爲勝保瀆請可見伊等互欲見好不顧大局此風斷不可長穆騰阿瑛榮均著傳旨嚴行申飭○諭議政王軍機大臣等鳳翔爲西路要區該郡被圍半年無兵援救瑛榮身任地方清夜自思何顏對此士民雷正綰近在咸陽卽著咨商令其統帶所部各軍馳赴鳳翔迅解城圍鳳翔士民困守半年可憫可嘉並著瑛榮派員前往傳旨嘉

獎慰諭且告以援軍指日可到庶民心愈形固結該撫不得以統帥有人置軍務於不問省城爲根本重地穆騰阿務當會同瑛棨馬德昭相機防剿毋稍疏懈瑛棨貽誤地方久當治罪宜如何另圖晚蓋以贖前愆若仍毫無振作恒怯偷安則軍律具在亦不能屈法以拂輿情也懷之勉之將此由六百里各諭令知之○諭前據景綸等奏報朝陽流匪葛城澧等竄至三姓黑背地方復突至烏斯胡屯褻脅數千人負隅橫恣嗣復據奏葛城澧等糾匪萬人分擾烏斯明果匣子溝等處分路撲城疊經諭令景綸等會派各路兵勇一體兜拏並未據該將軍等將此股賊匪如何痛加剿洗情形詳細續奏茲據景綸等奏葛城澧勾結金匪出巢被擊四散該逆帶同百餘賊向東奔逃官軍分路進剿足資搜捕毋庸鄰省援兵助剿各等語景綸等前後所報匪眾數目多寡何以如此懸

殊前奏由數千至萬人之眾究竟何往是否係前次偵探不實卽係此次粉飾奏報著景綸等確查覆奏黑龍江與三姓以江爲界見既經特普欽派兵嚴防卽著景綸等知照特普欽嚴密堵擊毋令匪徒逃竄並嚴飭富尼揚阿派出之佐領訥爾吉等跟蹤追剿務將首逆擊獲匪眾殲除毋得貽誤致干重咎黑龍江官兵如可毋須助剿卽著景綸等知照特普欽暫停調派將此由五百里各諭令知之○諭崇厚等奏遵覆軍務各情一摺另片奏已革參將王恩第查無通賊實據請暫免正法等語竄擾南宮雞澤等處股匪據崇厚等查明係止張錫珠一股其回竄館陶等處之匪馬步亦僅二三千人自不難於殄滅著崇厚等懍遵前旨仍由寶山等酌量帶兵越境追剿宋憬詩尙在東昌卽著嚴飭革員會同夾擊以期盡殲醜類迅就廓清至宋憬詩先後調到馬步練勇千餘名

該署督恐其流而爲匪未便遽行遣散自係從權辦理仍當妥爲
駕馭毋得稍涉大意王恩第通賊情事雖查無實據惟孫治因其
添募勇丁未敢拏辦崇厚復因其招致宋勇責令殺賊自贖是王
恩第挾宋憬詩以自固崇厚之不能操縱自我已可概見該署督
致軍機處另函聲稱如該革員故態復萌另有辦法等語恐仍是
紙上空談未必確有把握王恩第雖緩正法仍著崇厚嚴密查察
隨時設法懲辦洋槍隊黑龍江馬隊計先後到齊崇厚等務當振
刷精神刻刻爲自強之計毋徒恃宋勇以勦賊致王恩第有所恃
而不恐宋憬詩氣餒日盛蔑視官軍也嗣後崇厚務當以實情上
達不可徒以敷衍爲能又蹈文煜覆轍遮克敦布貽誤各情朝廷
早已知之毋庸再行查辦著崇厚卽派員押解來京交兵部解赴
處所寶山業已到營嗣後崇厚奏報軍情著准其列銜具奏將此

由五百里各諭令知之○予直隸陣亡護軍參領烏什杭阿等祭
葬世職○丙子申諭多隆阿等迅解鳳翔岐山城圍以瑛棨膜視
軍務切責之○是月展緩直隸開州等三十五州縣被擾額賦蠲
緩江蘇川沙等三十三廳縣被擾新舊額賦雜課山東臨清等七
十一州縣衛所被擾及水旱風蟲本年額賦租課緩徵兩淮富安
等十四場被水竄地上年額賦貸河南信陽等六州縣難民兩月
口糧廣州駐防旗營修理衙署銀